



# L'apprentissatge de las sciéncias dens las classas bilinguas. Quin podem desenvolopar competéncias lengatgèras dens ua sequéncia d'apprentissatge de las sciéncias dens ua classa bilingua ?

Élodie Castaing

## ► To cite this version:

Élodie Castaing. L'apprentissatge de las sciéncias dens las classas bilinguas. Quin podem desenvolopar competéncias lengatgèras dens ua sequéncia d'apprentissatge de las sciéncias dens ua classa bilingua ?. Education. 2013. dumas-00977446

HAL Id: dumas-00977446

<https://dumas.ccsd.cnrs.fr/dumas-00977446>

Submitted on 11 Apr 2014

**HAL** is a multi-disciplinary open access archive for the deposit and dissemination of scientific research documents, whether they are published or not. The documents may come from teaching and research institutions in France or abroad, or from public or private research centers.

L'archive ouverte pluridisciplinaire **HAL**, est destinée au dépôt et à la diffusion de documents scientifiques de niveau recherche, publiés ou non, émanant des établissements d'enseignement et de recherche français ou étrangers, des laboratoires publics ou privés.

**MÉMOIRE DE MASTER2**  
**MASTEUR EFE-ESE**  
**ANNÉE 2012-2013**

École interne IUFM Midi-Pyrénées/UT2  
En partenariat avec UT1, UT3 et CU-JF Champollion

Présenté et soutenu par :

**Elodie CASTAING**

**TITRE DU MÉMOIRE**

**L'aprentissatge de las sciéncias dens las classas bilinguas**  
*Quin podem desenvolopar competéncias lengatgèras dens ua  
sequéncia d'aprentissatge de las sciéncias dens ua classa  
bilingua ?*

Encadrement :

**Pierre ESCUDE**  
MCF IUFM Mieidia-Pirenèas

**Jean Louis LAVIT**  
CPS Hautas-Pirenèas, IUFM MP

**TRAJET RECHERCHE**

**OCCITAN, BILINGUISME ET PLURILINGUISME DES LANGUES ROMANES  
(GASCON)**

# Somari

<i>Introduccio</i> .....	- 2 -
<b>I. LO BILINGÜISME E LAS SCIÉNCIAS .....</b>	<b>- 4 -</b>
1. <i>LO BILINGÜISME ÇÒ QU'EI ? .....</i>	- 4 -
a. <i>Definicion.....</i>	- 4 -
b. <i>Estructuracion deu bilingüisme a l'escola primària.....</i>	- 5 -
2. <i>LOS INTERÈS LENGATGERS E LINGÜISTICS DE LAS SCIÉNCIAS DENS LAS CLASSAS BILINGUAS.....</i>	- 6 -
a. <i>L'interès lingüistic.....</i>	- 7 -
b. <i>Los interès lengatgers : los camps lexicaus – los tipos de frasas e los tipos de tèxtes.....</i>	- 8 -
3. <i>LOS PROGRAMAS, LAS CIRCULARIAS E LO SOCLE COMUN .....</i>	- 10 -
<b>II. LA DEMARCHA SCIENTIFICA A L'ESCOLA.....</b>	<b>- 13 -</b>
1. <i>LAS DIFERENTAS FASIS DE LA DEMARCHA SCIENTIFICA.....</i>	- 13 -
a. <i>Situacion problema.....</i>	- 15 -
b. <i>Ipotèsis.....</i>	- 16 -
c. <i>Activitat de recèrca.....</i>	- 16 -
d. <i>Espleitada de las resultas.....</i>	- 19 -
e. <i>Conclusion .....</i>	- 20 -
2. <i>L'UTILIZACION DEU QUASERN DE SCIENCIAS.....</i>	- 22 -
a. <i>Lo sué contengut.....</i>	- 23 -
b. <i>La sua estructuracion .....</i>	- 24 -
c. <i>L'avaloracion .....</i>	- 26 -
3. <i>LA PLAÇA DEU QUASERN DE MOTS .....</i>	- 28 -
<b>III. PRACTICA DE CLASSA .....</b>	<b>- 29 -</b>
1. <i>SEQUÉNCIA DE LENGA : L'ENONCIATIU .....</i>	- 32 -
<i>Sedença 1 : Lo verbe e l'enonciatiu dens les frasas afirmativas e negativas.....</i>	- 32 -
<i>Sedença 2 : Non pas desbrembar l'enonciatiu.....</i>	- 34 -
<i>Sedença 3 : Emplegar l'enonciatiu espontanèament.....</i>	- 36 -
<i>Sedença 4 : avalacion .....</i>	- 37 -
2. <i>SEQUÉNCIA DE SCIÉNCIAS : MESCLADÍS E SOLUCIONS OMOGENÈUS E ETEROGENÈUS .....</i>	- 38 -
<i>Sedença 1 : descobèrta de las solucions omogenèas e eterogenèas.....</i>	- 38 -
<i>Sedença 2 : proprietats de las solucions omogenèas e eterogenèas.....</i>	- 41 -
<i>Sedença 3 : los mescladís solide-liquide – la decantacion e la filtracion.....</i>	- 44 -
<i>Sedença 4 : avalacion somativa .....</i>	- 47 -
3. <i>ANALISI GLOBALA .....</i>	- 47 -
<i>CONCLUSION.....</i>	- 49 -
<i>BIBLIOGRAFIA.....</i>	- 50 -
<i>ANNEXAS .....</i>	- 51 -

## Introduccion

Dens las classas bilinguas, los eslhèves qu'aprenen l'occitan a travès las autas disciplinas. Qu'ei a díser, que ne hèn pas cors d'occitan, mes que hèn cors en occitan. Qu'ei donc interessant de respóner a la question :

*Quin se hè l'apprentissatge de l'occitan dens las classas bilinguas ?*

Mès los eslhèves, en mei d'apréner l'occitan, qu'aprenen la disciplina. Qu'aprenen donc tanben lo vocabulari ligat a la disciplina. Òm pòt donc demandà's :

*Quin hèn los eslhèves entà apréner lo lengatge de la disciplina mentre que ne mestrejan pas encòra tot a fèit la lenga dens la quau l'aprenen ?*

Qu'ei interessant de ciblar aquò sus ua disciplina. Las sciéncias que son ua disciplina on i a un hèish d'escambis orau e escriut. Òm pòt donc s'i interessar. De mei, lo vocabulari de las sciéncias qu'ei un vocabulari pro especiau, la question precedenta que vad donc :

*Quin hèn los eslhèves entà apréner lo langatge scientific mentre que ne mestrejan pas encòra tot a fèit la lenga dens la quau l'aprenen ?*

Fin finala, au moment de s'acarar a la concepcion d'unitats d'apprentissatge en sciéncias, òm pòt demandà's :

- *Quinas competéncias lengatgèras e desenvolopan los eslhèves dens ua sequéncia de sciéncias ?*
- *Quin hèr entà amiar los eslhèves a desenvolopar aqueras competéncias ?*
- *Quau dispositiu emplegar (materiau, disposicion de classa) ?*
- *Quin botar los eslhèves en situacion d'apprentissatge ?*

Totas aqueras questions que pòden estèr arregropadas dab la problematica seguenta :

***Quin podem desenvolopar competéncias lengatgèras dens ua sequéncia d'apprentissatge de las sciéncias dens ua classa bilingua ?***

Entà poder respóner ad aquera question que cau parlar de l'apprentissatge de las sciéncias dens las classas bilinguas. Mes entà parlar de l'apprentissatge de las sciéncias en las classas bilinguas, que cau en purmèr parlar deu bilingüisme. La definicion deu bilingüisme que respon a las questions :

- *Çò qu'ei ?*
- *Quin fonciona ua classa bilingua ?*
- *Quin son despartits los oraris francés-occitan ?*
- *Quinas disciplinas e's hèn en francés e quinas e's hèn en occitan ?*

De mei, que cau conéisher la plaça de las sciéncias dens lo bilingüisme. Entad aquò òm deu espiar l'interès de hèr las sciéncias en occitan, qu'ei a díser, los avantatges d'un tau apprentissatge. Aqueths que s'arretròban deu constat deu lexic e de l'aquisicion de competéncias lengatgèras a l'orau e a l'escriut. Que vam véder que i a un vertadèr interes lingüistic e lengatgèr per l'occitan a hèr sciéncias en lenga occitana.

Aqueths apprentissatges que son quadrats per las instruccions oficiaus. Qu'èi causit de tractar lo subjècte au cicle tres. En hèit, qu'ei sonque au cicle tres que i a ua disciplina qui s'apèra « sciéncias ». En mairala e en cicle dus los programas que parlan de « descobèrta deu monde ». Òm va donc tanben parlar de las instruccions oficiaus peu cicle tres.

Que cau en segond parlar de las sciéncias a l'escòla. Adara, quan parlam de sciéncias a l'escòla, que parlam de la demarcha scientifica. Qu'ei en quauques sòrtes la lista organizada de çò qui cau hèr entà anar de cap tà ua nocion scientifica. Qu'ei compausada de mantuas fasis e per cadua, que'ns podem demandar :

- *Qué çò que's passa dens aquera fasi ?*
- *A qué serveish ?*
- *Quin véder qu'èm dens aquera fasi ?*

Entà espiar aqueras fasis, que i a adara un utís plan emplegat dens las classas e qui ei plan enriquissant entà véder los escriuts deus mainats : qu'ei lo quasèrn de sciéncias. Que vam donc véder quau ei l'interès d'aqueith quasèrn per l'aquisicion de competéncias lengatgèras.

Enfin, entà poder plan respóner a la problematica, que cau verificar la teoria per la practica. Ua sequéncia qu'ei donc botada en plaça e analisada dab la classa bilingua de CM2 de l'escòla de Plasença deu Gèrs.

Fin finala, qu'assajaram de respóner a la problematica en parlar en permèr deu bilingüisme, en segond de la demarcha scientifica e enfin de la practica de classa.

## **I. Lo bilingüisme e las sciéncias**

### **1. Lo bilingüisme çò qu'ei ?**

Lo mot “bilingüisme” qu’ei un mot qui ei passat dens lo lengatge corant, mes lo monde que’n parla sovent sens trop saber de qué parla. Aquiu ua definicion deu bilingüisme que’ns pòt esclairar.

#### **a. Definicion**

Entà Nadine Kuehne, lo bilinguisme qu’ei :

« *la mise en présence de deux langues qui provoque un ensemble d’interférences linguistiques, psychologiques et sociologiques [...] Il s’agit de l’usage alternatif de deux idiomes que le sujet parlant emploie tour à tour pour les besoins de son expression. [...] il s’agit de la compétence de locuteur natif dans deux langues.[...] il s’agit de deux langues de statut identique* »

Nicole Denni-Krichel que'u definit coma sec :

« *Etre bilingue c'est posséder deux langues et parler chacune d'elle aussi bien qu'une personne dont c'est la langue officielle. [...] de manière générale, est bilingue une personne qui utilise régulièrement deux langues dans la vie de tous les jours, avec différents interlocuteurs et dans différentes situations.* »

Lo bilingüisme qu’ei donc lo hèit de parlar e de comprénder duas lengas. N’i a pas ua lenga qui domina : que son au medish nivèu, au contrari de la diglossia, on ua lenga qu’ei la lenga ua, qu’ei a diser la lenga mairala, e l’auta qu’ei la lenga dus, apresa tà l’escòla per exemple. Atau, ua persona bilingua n’ha pas besonh de tornar a ua lenga entà comprenéner l’auta.

En França, que i aveva hèra de personas bilinguas, mes après l’edit de Villers-Côteret, l’occitan qu’estó espudit de l’ensenhamant, e chic a chic, lo monde que'u deishan càger a l’escriut puish a l’orau. Davant aquera constatacion, las politicas qu’an botat en plaça la lei Deixone en 1951. Aquera lei que reconeish la legitimitat de la transmission de las lengas regionalas. Que i a donc ua permèra presa de consciéncia per rapport a l’importància deu

bilingüisme e a la plaça de la lenga occitana. En efèit, dens lo programma de referéncia per lo desvolopament de l'ensenhament de la lenga e de la cultura occitanas, que podem leguir :

*« La prise de conscience d'un risque de disparition de la langue et de la culture occitanes a entraîné une meilleure reconnaissance sociale, une envie de savoir et de comprendre, une sympathie plus active qui traversent les différents courants de pensée. [...]Tout cela démontre un attachement croissant pour la langue et la culture d'oc et la conscience de l'enjeu que représente l'enseignement pour son avenir.*

*Les mesures prises en faveur de l'enseignement de l'occitan ont accompagné et renforcé l'amélioration du statut de la langue et de la culture occitanes dans l'opinion. Le fait que l'école enseigne à des enfants la langue qu'elle avait jadis interdite à leurs grands-parents démontre ce changement. »*

A partir d'aqueth moment, l'occitan qu'entra chic a chic dens l'educacion nacionala. En permèr, que i a cors de lenga qui son balhat e puish, las permèras escòlas bilinguas que's fondan. Adara, las lengas regionalas qu'an pres ua plaça importanta dens l'educacion. Que podem donc díser que las lengas regionalas qu'an cambiat d'estatut dens l'educacion nacionala : que son passadas de lengas denegadas a lengas valorisadas.

Quitament si las lengas regionalas e son adara valorisadas, qu'ei necessària qu'aja un quadre entà l'estructuracion deu bilingüisme. Aquiu, que'ns vam ocupar deu bilingüisme a l'escòla primària.

#### *b. Estructuracion deu bilingüisme a l'escòla primària*

Lo principi de las escòlas bilinguas qu'ei lo seguent : los escolans que receben cors d'occitan (ua òra per setmana), mes tanben cors en occitan.

L'educacion nacionala qu'a decidit de botar en plaça, a l'escòla primària, lo principi de paritat orària. En efèit, la mitat deus cors que son balhats en occitan, e l'autra mitat que son balhats en francés. Au cicle 3, lo francés e l'istòria de França que son hèits en francés, alavetz que las matematicas, las sciéncias e la geografia que son hèitas en occitan. Las autas

disciplinas que son partatjadas a paritat orària entre l'occitan e lo francés (cf. Tablèu recapitulatiu de la paritat orària en devath) .

<b>Disciplinas dispensadas en francés</b>	<b>Disciplinas dispensadas en occitan</b>
Francés	Occitan
Istòria – instrucción cívica e moral	Geografia – instrucción cívica e moral
	Mathematicas
	Sciéncias - technologia
EPS	
Lenga viva estrangèra	
Practica artística e istòriade las arts	

#### Tablèu recapitulatiu de la paritat orària

Atau, quitament si los eslhèves ne son pas bilingües quan entran a l'escola, que receben un ensenhamant bilingüe pr'amor de la paritat orària. Qu'ei aquiu que's hè la diferencia entre lo hèit de recéber un ensenhamant bilingüe e d'estèr bilingüe. En efèit, los escolans que son en apprentissatge, donc ne mestrejan pas encòra totalament la lenga. Qu'an tostems besonh de hèr referéncia au francés. Qu'ei donc au regent de hèr ponts entre las duas lengas. Qu'ei atau que's basteish lo bilingüisme a l'escola primària.

## 2. Los interès lengatgers e lingüistics de las sciéncias dens las classas bilinguas

La practica de las sciéncias dens las escòlas primàries bilinguas qu'a mantuns interès d'un punt de vista lengatger e d'un punt de viste lingüistic. Que parlaram en permè de l'interès lingüistic.

### *a. L'interès lingüistic*

Que sia en sciéncias o en las autas disciplinas, lo bilingüisme que permet d'aprénar la disciplina merces a la lenga e la lenga merces a la disciplina. En efèit, pendent ua sequéncia de sciéncias, los eslhèves qu'aprenen lo contengut scientific, mes conte tengut que la sequéncia e's hè en occitan qu'aprenen tanben la lenga. Òm pòt parlar d'inferéncia disciplinària. Aqueth fenomen qu'ei hèra interessant d'un punt de vista lingüitic, e que i a un hèish de cercaires qui s'i son interessats, coma per exemple Daniel Coste e Laurent Gajot.

Dens lo sué libe *Immersion, bilinguisme et interaction en classe* lo Laurent Gajot qu'a ua apròcha hèra téorica deu bilingüisme. Que parla sustot de l'imersion, mes entà eth, un dròlle que sec un ensenhament bilingüe que desenvolopa hèra de competéncias lingüísticas, tau coma la competéncia estratègica, la competéncia de comunicación, la de gramatica, etc... e totas aqueras competéncias que permeten de construir la competéncia bilingua. Qu'ei donc hèra interessant pr'amor que prepara los mainats a aprénar d'autas lengas. Lo Laurent Gajot que'ns amuisha donc l'interès lingüistic deu bilingüisme sens trop estancà's sus la disciplina non lingüística (auius las sciéncias).

Lo Daniel Coste, eth, dens lo sué article *Construire des savoirs en plusieurs langues. Les enjeux disciplinaires de l'enseignement bilingue* que s'i interessava. Que'ns explica que l'alternancia de las duas lengas, dens un ensenhament bilingüe que permet ua mei grana finessa de compreneson e un enriquissament deu vocabulari deus eslhèves. Que's pauza la question de l'impacte de las lengas sus las disciplinas e la loa construcción. Entà eth, l'ensenhamant bilingua qu'ei a l'encòp favorable a l'apprentissatge de las lengas, e a l'apprentissatge de las disciplinas non lingüísticas. En efèit, ua medisha noción que pòt aver ua representacion diferente dens las duas lengas. Coste qu'amuisha que i a mots qui son mei transparents dens ua lenga e qui an un nom mei scientific dens l'aute. Conéisher los dus, que pòt ajudar l'eslhève a memorizar la noción mei aisidament tot en comprénder qu'aquò ei plan ua definicion scientifica. (Coste que balha l'exemple de « médiatrice » en francés, qui ei un mot scientific, e qui ei un mot mei transparent en alemany). De mei, que i a expressions e figuracions d'estille (metafòras, metonimia) qui son diferentes d'ua lenga tà l'aute. Conéisher las dues que pòt ajudar lo mainat a mei mestrejar lo concept. Per exemple : lo cap gròs (en francés : le tétard) que hè pensar au cap. En italiano, qu'a un nom de qui hè pensar a la sua

fòrma. L'associacion deus dus tèrmes que balha aus eslhèves ua idea mei clara de çò qu'ei un cap gròs. Enfin, Coste que balha l'exemple deu sorelh : en daubuns país que disem que's cocha, en d'autas que disen que s'escon, o que cad o que desapareish... Totas aqueras imatges qu'amuishan l'aproximacion deu hèit scientific.

Que i a donc un hòrt interès lingüistic a practicar sciéncias dens un contexte bilingüe, tan per las sciéncias coma per las lengas. Mes que i a tanben un gran interès lengatgèr.

*b. Los interès lengatgèrs : los camps lexicaus – los tipos de frasas e los tipos de tèxtes*

En permèr, la practica de las sciéncias que permet d'aquesir un vocabulari scientific. En efèit, lo permèr objectiu lengatgèr d'ua sequéncia de sciéncias qu'ei d'aquesir lo vocabulari ligat a la sequéncia. Per exemple, si la sequéncia e parla deus parpalhons, los eslhèves qu'an a construsir lo vocabulari ligat aus parpalhons. Tot aquò que va permetre d'aquesir un camp lexicau ligat aus diferents tèmas d'estudi scientific.


De mei, los escriuts scientifics qu'an quauques especificitatats. En efèit, Viviane Bouysse dens la sua intervencion au collòqui “sciences en jeu” qu'explica que son decontextualizats (òm ne parla pas d'un lòc précis) e generalizats. Los escolans que son donc obligats d'emplegar la tresau persona deu singular o deu plurau entà s'exprimir, a la plaça de las permèras e segondas personas qu'an l'abitud d'emplegar, sustot a l'orau. Que i a tanben ua implicacion au nivèu de la conjugason. Qu'emplegan tanben temps especiaus : lo present de l'indicatiu, a còps lo futur e lo passat compausat, drin de present deu subjonctiu... En hèit, n'emplegan quasi que temps de l'indicatiu dab ua veritat generala. Que i a tanben connectors precís e còdes especiau (per exemple dab la valor de las parentèsis o de las majusculas, etc...).

En hèr sciéncias, òm desenvolopa tanben lo vocabulari emplegat entà la demarcha scientifica. Los eslhèves que van donc apréner lo nom de las differentas estapas, mes tanben lo lor sens. Aquò qu'ei indispensable pr'amor los eslhèves que'us van emplegar tot au long de la loa escolaritat, e chic a chic que'us van emplegar en autonomia. Per exemple, après l'observacion d'un objècte, lo regent que pòt demandar aus eslhèves de hèr ua ipotèsi entà

trobar lo funcionaments d'aqueuth objècte. Los eslhèves que devén donc mestrejar lo mot ipotèsi entà plan poder respóner a la consigna.

La demarcha scientifica qu'ei compausada de mantuas estapas diferentas. A cada estapa que correspon un vocabulari especiau. Per exemple, pendent l'observacion òm emplega "òm ved", "òm arremarca" mentre qu'aqueuth vocabulari ne s'emplega pas pendent la conclusion. De la madeisha faiçon, qu'emplegam los mots "dilhèu", "òm pensa" au moment de pausar l'ipotèsi. Las sciéncias que permeten donc d'emplegar mantuns tipos de tèxtes e mantuns tipos de frasas.

En efèit, per çò qui ei deus tipos de frasas, que i a fasis on cau emplegar frasas declarativas (observacion, ipotèsi, conclusion...), mes tanben fasis on cau emplegar frasas interrogativas (problematica), e enfin fasis on cau emplegar frasas injonctivas (protocòlle experimentau). Fin finala, que podem díser que tots los tipos de frasas e son emplegats en sciéncias (cf. Produccion d'eslhève en devath).



Per çò qui ei deus tipos de tèxtes, en sciéncias los escriuts produsits peus eslhèves que son sovent tèxtes descriptius (per exemple au moment de l'observacion, o de la situacion problema), tèxtes explicatius, o informatius (per exemple per la conclusion), e tèxtes injonctius (dab lo protocòlle experimentau per exemple). Mes òm pòt tanben arrencontrar tèxtes narratius, conversacionaus o argumentatius en moda d'introduccion de la sequéncia. En efèit, entà dintrar dens lo subjècte òm pòt quasi tot emplegar deu moment que tracta de çò

qu'avem causit. Fin finala, lo sol tipo de tèxe qui ei pòc probable d'encontrar en sciéncias qu'ei lo tipo poetic. Las sciéncias que son donc un miei hèra ric entà practicar la lenga, e que presenten donc un hòrt interès deu punt de vista lengatgèr.

Fin finala, dens las escòlas primàrias, la practica de las sciéncias que permet de manipular a pus près tots los tipos de frasas e tots los tipos de tèxtes. Qu'ei donc ua manèra hèra enriquissanta de tribalhar la lenga a l'orau coma a l'escriut, en dehòra deus cors de lenga.

Dens las escòlas bilinguas francés-occitan, que permet donc de desenvolopar l'occitan, e donc lo bilingüisme.

### *3. Los programas, las circulàrias e lo sòcle comun*

Despuish la lei Deixone de 1951 qui a reconegut la legitimitat e l'utilitat de las lengas regionalas, mantuns tèxtes e mesuras qu'an apareishut entà l'ensenhament de la lenga occitana. Qu'ei atau que son nascudas las classas bilinguas francés-occitan. Los tèxtes que demandan aus regents de hèr un ensenhament a paritat orària (12h en Occitan e 12h en Francés), entà desenvolopar competéncias lingüísticas en occitan dens las activitats disciplinàrias. Que devén tanben aprofieitar de las semblanças e de las diferéncias de las duas lengas entà desenvolopar competéncias metalingüísticas e mestresa de las lengas ensenhadas. Atau, en CM2, los eslhèves que devén aver lo nivèu A2 en lenga occitana.

Dens aquera paritat orària, l'ensenhament de las sciéncias qu'ei previst en occitan. Mes los eslhèves que segueishen totun lo medish programa que los eslhèves qui son en classas monolinguas (cf. BOEN n°1 du 5 janvier 2012 – partida sciéncias peu cicle 3 ). Que podem notar que dinc au cicle tres, los eslhèves ne hèn pas vertadèrament sciéncias. En efeït, au cicle dus, qu'an ua permèra apròcha de las sciéncias a travès la disciplina “descobèrta deu monde”, qui ei compausada de dus items qui son :

- Reperà's dens l'espaci e lo temps
- Descobrir lo monde deu vivant, de la matèria e deus objèctes

A travès lo segond item, qu'aprenen la naishença, la creishença e la reproducccion, la nutricion etc... mes tanben l'igièna, los cambiaments d'estat de la matèra (liquide, solide) e qu'an ua permèra apròcha de l'electricitat.

Atau, quan arriban au cicle tres, los eslhèves qu'an totun quauques coneishenças scientificas, qui los permeten de poder abordar los subjèctes segunts :

- Lo cèu e la Tèra
- La matèra
- L'energia
- L'unitat e la diversitat deu vivant
- Lo funcionament deu vivant
- Lo funcionament deu còs uman e la santat
- Los estèrs vivants dens lo lor amiroament
- Los objèctes tecnics

Lo BO n°3 deu 19 junh de 2008 que preconiza de tractar aqueths subjèctes segon l'esperit de “la main à la pâte”(cf. Extrèit deu site de “la main à la pâte” en devath), qu'ei a díser per la demarcha d'investigacion (o demarcha experimentala) qui permet de desenvolopar la curiositat, la creativitat, l'esperit de critica, e l'interès entà lo progrès scientific e tecnic. Atau, los eslhèves que seràn sensibles a l'amiroament, au monde vivant e a la santat, e que compreneràn l'esperit deu desenvolopament durader. L'objectiu qu'ei donc de hèr aquesir aus escolans l'esperit scientific. Que preconiza tanben d'amassar los escriut scientific dens un libet d'observacion o un quasèrn d'experiéncias.

Extrèit deu site “la main à la pâte” :

« *La démarche préconisée par La main à la pâte s'appuie sur dix principes et articule apprentissages scientifiques, maîtrise des langages et éducation à la citoyenneté. Pour cela, les enseignants soumettent à la curiosité de leurs élèves des objets et des phénomènes du monde qui les entourent, suscitant le questionnement scientifique. Celui-ci conduit à la formulation d'hypothèses destinées à être testées par l'expérimentation ou vérifiées par une recherche documentaire. Ainsi, les élèves s'approprient progressivement concepts scientifiques et techniques opératoires et consolident leur expression orale et écrite.* »

Aqueth programa que s'inscriu dens l'idea deu sòcle comun de las coneishanças e de las competéncias. Lo sòcle comun qu'ei bastit de sèt pilièrs qui son :

- La mestresa de la lenga francesa
- La practica d'ua lenga viventa estrangèra
- Los principaus elements de matematicas e la cultura scientifica e tecnologica
- La mestresa de las TUIC : tecnicas usualas de l'informacion e de la comunicacion
- La cultura umanista
- Las competéncias socialas e civicas
- L'autonomia e l'iniciativa

Aqueths pilièrs n'arremplaçan pas los programas, mes los eslhèves que devén validar las competéncias tot au long de la loa escolaritat, en mei de seguir lo programa.

Que podem constatar que las lengas regionalas n'entran pas explicitament dens las competéncias deu sòcle, mes que contribuín a la sua realization (a travès la paritat orària). Qu'amuisha plan la loa especificitat. En efèit, la practica de l'occitan n'ei pas ua obligacion coma per exemple la practica d'ua lenga estrangèra. Lo bilingüisme qu'ei ua causida deus mainats o deus pairs.

## **II. La demarcha scientifica a l'escòla**

Quan hèm sciéncias qu'avem a seguir ua demarcha d'investigacion. A l'escòla, que hèm seguir aus eslhèves la medisha demarcha qu'au scientifics. Que pòrta lo nom de demarcha scientifica, demarcha d'investigacion, demarcha experimentala etc... Aquera demarcha que permet d'aver ua organizacion, e de ne pas tornar en darrèr per arren. Entad aquò qu'avem besonh de sauvar traças escriutas. A l'escòla qu'emplegam lo quasèrn d'experiéncias.


### **1. Las diferentes fasis de la demarcha scientifica**

La demarcha scientifica qu'ei compausada de mantuas fasis qui permeten d'anar de cap tà un rasonament. Las principales fasis que son :

- La confrontacion a la situacion problema
- La formulacion de las ipotèsis
- L'activitat de recèrca de la solucion
- L'espleitada deus resultats
- La conclusion

Dens ua investigacion, que las devem totas arretrobar, dens l'ordi : òm pòt pas hèr la conclusion abans d'aver hèita la manipulacion per exemple. Mes, a còps qu'avem a tornar en darrèr (cf. esquèma : la demarcha d'investigacion).


Esquèma : La demarca d'investigacion (traduccio deu document « démarche scientifique – IUFM Crêteil » en annexas)



### *a. Situacion problema*

La situacion problema qu'ei la permèra fasi de la demarcha scientifica. Pendent aquera fasi, que botam los eslhèves fàcia a un problema qu'auràn a solucionar gràcia a las diferentes estapas de la demarcha. Qu'an a observar lo fenomèn o l'objècte entà plan comprénder lo problema pausat. Los supòrts que poden estar hèra variats : que pòt estar un objècte, un tèxte, ua foto (o los dus), un fenomèn dens la natura, un document video, etc...

Prenem l'exemple deu fonctionament deu manètge (classa de CM1-CM2 de Plasença, annada 2011 – 2012). Los eslhèves qu'an aqueth dessenh dab aqueth petit tèxte devath los uelhs :



Situacion de despart

A partir d'aquò, la regenta qu'a pausat lo problema : Coma fonciona lo manètge ? Pendent aquera fasi, los mainats qu'espian plan lo dessenh deu manètge entà véder que sembla virar e qu'aquera question qu'ei un vertadèr problema, pr'amor n'avem pas la responsa sonque en espiar. Que cau imaginar quin pòt hèr entà virar.

Lo problema que pòt estar amiat sia peu regent, sia peus mainats. Aquiu tanben que i a ua variacion possible dens la faiçon d'abordar aquera fasi.

### *b. Ipotèsis*

Après la situacion problema, que i a ua fasi d'ipotèsi. Pendent aquera fasi los eslhèves qu'assajan de trobar ua resposta a la question pausada. Per aquò que formulan ipotèsis, qu'ei a díser respuestas temporàries que cau verificar.

Si tornam préner l'exemple deu manètge, en aquera fasi, los eslhèves qu'assajan de trobar la resposta a la question : Quin fonciona lo manètge ? Per aquò que balhan las loas ideas coma per exemple : « Que vira dab ua arròda ». Los mainats que pòden acompanhar l'ipotèsi d'un dessenh entà plan explicar (cf. *Traças escriutas de la classa de Plasença 2011 – 2012*, en annexas). Ad aqueth atge, dilhèu qu'ei mei aisit d'explicar dab un dessenh que de hèr granas explicacions.

### *c. Activitat de recèrca*

Après aver formulat ua ipotèsi, los escolans qu'an a la verificar. Que van donc miar ua activitat de recèrca de la solucion. Per aquò qu'an mantuas solucions. Que pòden, segon lo cas, hèr ua observacion, hèr ua experiéncia, documentà's o hèr ua modelizacion. Que vam arregropar l'observacion, l'experiéncias e la modelizacion devath lo tèrme de manipulacion. Cada activitat qu'a la sua especificitat :

#### *- L'observacion :*

L'observacion que's pòt hèr de faïcon ponctuala (exemple : observacion d'ua esqueleta). Dens aqueth cas, los renseñaments que seràn tostems los medishs, quau que sia lo moment de l'observacion. Mes l'observacion que's pòt tanben hèr sus un periòde pro long. Dens aqueth cas qu'ei ua observacion continua. Que consisteish a hèr un relhevat regular de caracteristicas determinadas a l'avança (devath la fòrma de mesuras per exemple). Que pòt estèr acompanhada d'un dessenh d'observacion. Per exemple, que seré hèra appropriada entà estudiar lo fonctionament deus vegetaus (la creishença per exemple). Quan decidam de hèr ua observacion continua, que cau donc determinar los critèris a observar puish hèr un relhevat regular d'aquelhs critèris acompanhhat o non d'un dessenh d'observacion.

L'observacion que pòt donc préner mantuas fòrmas e emplear mantuns ròtles (cf. tablèu en devath).

Observacion	Ròtle
Observacion liure	- suscitar la curiositat e amiar au questionament
Observacion organizada (orientada o sistematica)	- recercar critèris e/o indicis - verificar ua ipotèsi - seleccionar elements observable
Observacion comparada (dab d'autes, dab documents)	- permet de hèr serias o classaments - permet de hèr comparasons d'observacions hèitas dab differentas tecnicas - permet de hèr determinacions dab claus o modèls
Observacion continua o perloncada	- hèr comparasons dens lo temps - comprénder l'evolucion d'un fenomèn
Observacion au cors d'ua experiéncia	- establir relacions d'encausa - constatar e interpretar resultats

Tipos d'observacion segon la demarcha e los objectius (traduccio deu tablèu *Types d'observations selon la démarche et les objectifs*, en annexas)

- L'experiéncia :

Abans de hèr ua experiéncia, que cau cercar un protocòlle experimentau. Après, que cau amassar lo materiau qui cau, puish l'experiéncia que pòt estèr realizada. Lo protocòlle experimentau qu'ei hèra sovent acompañat d'un esquèma deu montatge. L'experiéncia que seré appropriada per exemple per l'estudi de la matèra. Òm pòt causir de hèr ua experiéncia quan ei realizable en classa, qu'ei a díser, quan n'exigeish pas un materiau tròp especific.

Qu'existeish dus tipos d'experiéncias :

<b>Tipo d'experiéncia</b>	<b>Experiéncia entà « véder »</b>	<b>Experiéncia entà « probar »</b>
<b>Ròtle</b>	Entà verificar quauqu'arren. Aqueras experiéncias ne permeten pas sovent de hèr ua conclusion, mes de constatar causas	Entà provar quauqu'arren. Aquiu que cau hèr situacions tèst on las variables e son isoladas
<b>Exemple</b>	- òm planta granas dens la tèra - òm las adaiga - òm ved si an possat o non	- òm hè l'ipotèsi que las granas qu'an besonh d'aiga e de sorelh entà viéner - òm hè ua experiéncia dab aiga e sorelh, ua shens aiga, e ua shens sorelh

### Tipos d'experiéncias

#### - La modelizacion :

Que i a còps on èm obligats de hèr modelizacion se volem manipular. En efeít, per exemple, quan volem apréner quin fonciona lo sistèma solar, ne podem pas hèr experiéncias. De mei, l'observacion de las planetas qu'ei possible dab un telescopi, mes n'ei pas trop judiciós, pr'amor qu'èm a l'interior deu sistèma solar, donc los mainats qu'an de mau a representà's lo sistèma vist de l'exterior. Coma ei ua nocion pro complexa entà mainats, qu'ei plan de realizar un modèl. Dab eth, que pòden plan imaginà's quin fonciona. Quan hèm un modèl, que parlam de modelizacion.


Que cau totun hèr atencion. Ua modelizacion n'ei pas ua experiéncia. Sovent, que hèm un modèl entà poder plan arrepresentà's ua nocion, mes en hèit que s'apresa sonque de la realitat, e qu'ei mauaisit de'n tirar conclusions. En classa que cau donc precisar la modelizacion dab la documentacion.

- La documentacion :

Òm realiza ua documentacion sia entà completar las manipulacions, sia quan las manipulacions ne son pas possible, coma per exemple quan tribalham suu fonctionament deu còs uman.

En efèit, que cau lo mei possible hèr manipular los mainats, entà que las sciéncias e sian mei concretas. Mes la documentacion qu'ei tanben hèra importanta, e qu'ei hèra utila entà precisar los resultats d'ua manipulacion. Que pòt servir per exemple a montar ua experiéncia, en tornar hèr çò que d'autes an dejà hèit abans. De mei, que cau apréner aus mainats a documentà's, pr'amor sovent qu'an lo reflèxa de cercar sus internet sens saber trop i cercar. Que'us cau donc apréner a cercar sus internet mes tanben a cercar dens los libes.

Entà recapitular l'activitat de recèrca :



d. Espleitada de las resultas

Après l'activitat de recèrca, qu'avem resultas. En efèit, en documentà's que trobam resultas qui son dejà explicada, mes quan òm manipula, òm a resultas brutas sens nada explicacion. La fasi d'espleitada deus resultats, qu'ei ua fasi on òm hè un relhevat de las resultas e on òm assaja de las explicar e de las compréner.

Pendent aquera fasi, sovent que cau hèr tablèus, grafics, corbas, etc... entà poder explicar lo fenomèn. A l'escòla primària, n'emplegam pas trop utís scientifics coma los grafics e las corbas, pr'amor, los eslhèves n'an pas encòra la capacitat de'us traçar, ni de'us compréner. De mei, los subjèctes tractats, n'an pas besonh d'un tau tractament d'informacion. La solucion qu'ei sovent hèra simple, e que's pòt verificar aisidament. Per exemple, si tornam a l'exemple deu manètge, los eslhèves qu'avèvan hèit l'ipotèsi que lo manètge e fonctionava dab arròdas dentadas. La fasi de manipulacion qu'èra lo montatge de quauques arròdas dentadas, e l'espleitada deus resultats qu'èra : quan botam arròda, lo manètge que vira. Aquiu, la fasi d'espleitada deus resultats qu'ei hèra pròcha d'ua conclusion.


En contra, l'utilizacion d'un tablèu qu'ei sovent apropiada entà véder l'evolucion de critèris d'observacion, de mesura. L'espleitada deus resultats que serà aquiu la confrontacion deus resultats entre eths.

#### *e. Conclusion*

La conclusion que pòt estèr la darrèra fasi d'ua demarcha scientifica. En efèit, si l'espleitada de las resultas qu'ei en acòrd dab l'ipotèsi de despart, la conclusion que serà la validacion de l'ipotèsi e l'explicacion deu fenomèn. Per exemple si tornam préner lo cas deu manètge, la conclusion que pòt estèr : "L'ipotèsi qu'ei validada : lo manètge que funciona dab arròdas dentadas. Quan hèm virar la purmèra arròda, las autas que viran e que hèn virar lo manètge".

En contra, si l'espleitada deus resultats n'ei pas en acòrd dab l'ipotèsi de despart, la conclusion que serà l'invalidacion de l'ipotèsi. En aqueth cas, que cau tornar hèr ua ipotèsi, la verificar, etc...

Exemple : conclusions de mainats sus l'activitat deus manètges :



"*La mia ipotesi qu'ei validada*"



"*Que ne marcha pas. L'ipotesi n'ei pas validada*"

Quan la resulta qu'ei ua escaduda, qu'ei important de l'institucionalizar. Que cau donc escriver un bilanç o ua sintèsi qui representa lo saber saberut, scientific. Qu'ei aquò que los eslhèves e deven arretiéner (cf. *Traças escriutas de la classa de Plasença 2011 – 2012*, en annexa). Aqueth bilanç que deu estèr escript per lo regent e los mainats amassa. Quitament si ei lo saber institucionau, qu'ei important que sia formulat peus mainats dab lo lor vocabulari, mes tanben dab vocabulari scientific. Atau, que s'apropian miéller aqueth vocabulari e que'u pòden tornar emplegar.

A travès totas aqueras fasis, los mainats qu'escambian hèra. En efèit, lo lengatge que hè partida de totas las fasis, que sia lengatge orau o lengatge escript. Que podem donc díser que las sequéncias de sciéncias e participan au desvolopament deu lengatge deus mainats, e qu'ei lo ròtle deu regent de hèr en sòrta qu'aqueth desvolopament e sia efectiu.

A l'orau, aquò qu'ei possible en hèr tornar formular, en demandar aus eslhèves d'emplegar lo bon vocabulari, etc... Mes tot aquò qu'ei long e que pòt amiar los escolans a aver paur de participar pr'amor que pensan que ne s'i escaden pas. Atau, dilhèu que cau estèr mei exigent a l'escript qu'a l'orau. Per aquò que cau un utís on totas las traças e son conservadas. Qu'ei atau que's justifica l'emplec d'un quasèrn de sciéncias.

## 2. L'utilizacion deu quasèrn de sciéncias

Lo quasèrn de sciéncias, tanben aperat carnet d'observacion o quasèrn d'experiéncias, qu'ei un quasèrn on l'eslhève e bota tot ço que hè en sciéncias. Aqueth quasèrn qu'ei recomandat per l'educacion nacionala despuish las anadas 2000. En efèit, lo BOEN 2008 qu'arrecomanda lo sué emplec :

*« Les travaux des élèves font l'objet d'écrits divers consignés, par exemple, dans un carnet d'observations ou un cahier d'expériences. »* extreit deu BOEN 2008.

Que serveish notadament a la validacion de las competéncias deu sòcle comun.

Aqueth quasèrn que respon a ua volontat de hèr evoluar la practica de las sciéncias. En efèit, los rapòrts IGEN qu'amuishan que los eslheves escriven pòc en sciéncias, alavetz que semblan aver dificultats entà hèr lo. En efèit, entad eths, los quasèrns que son harts de photocopies, e sovent los bilanç ne son pas realizats per la classa mes per lo regent sol.

Las loas dificultats que son ligadas au hèit que los escriuts produsits en sciéncias ne relhevan pas de l'imaginari, mes deu reau a explicar. Qu'ei donc mauaisit entaus mainats de's botar a escriver. De mei, qu'an paur de l'evaluacion. Qu'ei a díser qu'an paur de mau escriver, donc que s'estiman mei díser e manipular. Lo quasèrn d'experiéncias qu'ei donc un pretèxe entà hèr escriver los mainats (cf. Tablèu en devath : occasions entà escriver en sciéncias).

1. En debuta de sedença	3. En fin de sedença
<ul style="list-style-type: none"> <li>- concepcions inicialas</li> <li>- questions que l'eslhève (o la classa) e's pausa</li> <li>- problema a resòver (o questions a pausà's)</li> <li>- ipotèsis imaginadas</li> <li>- projècte d'experiéncias</li> </ul>	<ul style="list-style-type: none"> <li>- tablèus de resultats</li> <li>- grafic</li> <li>- esquèma explicatiu</li> <li>- resumit de çò qui ei a arretiéner</li> <li>- afica entà comunicar</li> </ul>
2. Pendent la demarcha	4. Pendent l'evaluacion
<ul style="list-style-type: none"> <li>- dessenh d'observacion</li> <li>- nòtas d'observacion</li> <li>- relhevat de mesuras</li> <li>- presa de nòtas pendent ua visita, ua sortida, pendent ua enquesta</li> <li>- informacions seleccionadas dens un document</li> <li>- conte rendut d'experiéncias</li> </ul>	<ul style="list-style-type: none"> <li>- restitucion de memòri d'un esquèma o d'ua definicion</li> <li>- esquèma a legendar o a explicar per un petit tèxte, etc.</li> </ul>

Ocasions entà esrcíver en sciéncias (traduccio deu tablèu *occasions fonctionnelles d'écrire en sciences*, en annexas)

#### a. Lo sué contengut

Dens aqueth quasèrn qu'arretròban tots los escriuts hèit peus mainats. Qu'ei a díser que i a escriuts personaus, mes tanben escriuts collectius (cf. *Traças escriutas de la classa de Plasença 2011 – 2012*, en annexas). En efèit, en sciéncias qu'ei hèra important de tribalhar en grops : qu'ei sovent la confrontacion de las diferentes ideas o deus problèmas qui hè avançar lo rasonament.

Qu'existeish un hèish d'escriuts diferents, qui pòden estar escriuts individuaus o collectius, coma per exemple, lo conte-rendut, lo dessenh d'observacion, etc... Dens la sua intervencion au collòqui “sciences en jeu” deu 14 de heurèr 2007, Viviane Bouysse, que bremba las diferentes foncions deus escriuts. Que i a los escriuts entà se-medish e los escriuts entà los autes. Los escriuts entà se-medish que serveishen entà agir (precisar un dispositiu,

anticipar sus resultats o sus choës deu materiau, planificar), memorizar (sauvar traças d'observacions, de recèrca o de lectura) o compréner (organizar, estructurar). Au contrari, los escriuts entà los autes que serveishen entà transmèter (çò qu'avem comprés per exemple), pausar questions a quauqu'un de l'exterior, explicar quauqu'arren, o hèr ua sintèsi.

Aqueths escriuts que s'arretròban donc devath mantuas formas, e los mainats que son amiats a :

- Hèr listas entà explicar, brembà's o hèr categorias
- Hèr questionaris (enquista, entrevista) entà informà's
- Construir frisas, esquèma dab legendas entà hèr categorias, ligar, hèr sintèsi
- Construir tablèus entà comparar, classar, hèr categorias
- Produsir tèxtes : los fabricar o tornar formular a partir d'un tèxte, d'ua explicacion orala, d'un esquèma, o d'ua experiéncia (conte-rendut), etc... entà contar, explicar, hornir, generalizar, transpausar
- Copiar o escriver devath la dictada entà memorizar
- Botar en pagina
- Hèr QCM, exercicis vertat/faus entà seleccionar e botar las informacions en relacion

Las listas, los questionaris, las frisas e las esquèmas, los tablèus, los tèxtes produsits o copiats, los QCM e los exercicis que son autan d'escriuts qui s'arretròban dens los quasèrns de sciéncias.

Lo passatge a l'escriut qu'ei hèra important a l'escòla primària, pr'amor, en mei d'emplear las foncions balhadas mei haut, qu'obliga los eslhèves a estèr mei precís. De mei, que'us fòrça a emplegar un vocabulari diferent de l'orau (cf I.2.b) coma per exemple l'emplec deu "òm" a la plaça deu "jo".

### *b. La sua estructuracion*

Lo quasèrn de sciéncias que pòt aver mantuas fòrmas. En efèit, que pòt estar un quasèrn, mes tanben un classader, un pòrtadocuments, etc... Dens tots los cas, la sua estructuracion que

sec las diferentes fasis de la demarcha scientifica. En efèit, los eslhèves que completan aqueth quasèrn a fin e a mesura que la sequéncia e's debana.

Mes totun, que sembla plan de poder diferenciar los escriuts espontanèus deus eslhèves deus escriuts institucionau, qui representan las leçons. Senon, quan los eslhèves e vòlen estudiar la loa leçon, ne saben pas que estudiar, pr'amor ne hèn pas la diferencia entre los diferents escriuts. Qu'ei donc important d'avèr un còde especiau entà poder raperà's. Atau, que sembla plan d'escriver abans cada escriut lo nom de la fasi (cf. *Traças escriutas de la classa de Plasença 2011 – 2012*, en annexas), e de diferénciar los escriuts de recèrca e lo bilanç. Per exemple, si lo quasèrn ei en hèit un classader que podem jogar sus las colors de las huelhas, si ei un quasèrn, que podem jogar sus la color d'escritura, o lo bilanç que pòt estar enquadrat etc...

Exemple de supòrts : (traduccion deu tablèu *supports*, en annexas)

*Lo classader* :

Quin ?	Entà quau usatge ?	
Las colors que hèn la diferencia	Las traças individualas personalas	A la debuta entà amorsar l'activitat : <ul style="list-style-type: none"> <li>- arremarcas e questions de despart</li> <li>- arrepresentacions</li> <li>- observacions liures, etc</li> </ul>
	Eras deu grop	Pendent l'activitat : <ul style="list-style-type: none"> <li>- questions arretienudas a l'estadi deu grop classa e reformulada dab l'ajuda deu regent</li> <li>- experiéncias, recèrca documentària</li> </ul>
	Los escriuts institucionaus	Après l'activitat : <ul style="list-style-type: none"> <li>- traça escriuta memòri : tèxte d'estatut documentària (çò que l'eslhève e deu arretiéner)</li> <li>- evaluacion</li> </ul>

Dus quasèrns :

Quin ?	Entà quau usatge ?
Un quasèrn d'assai pròpia a l'eslhève e a las activitats scientifics.	A la debuta , entà iniciar l'activitat : - arremarcas e questions de despart - arrepresentacions - observacions liures  Pendent l'activitat : - questions retienudas (au nivèu deu grop classa) e reformuladas dab l'ajuda deu regent - experiéncias, recèrcas documentàrias, etc - traças escriutas memòri entà continuar la recèrca
E en parallèla :	
Un quasèrn dab : - las demarchas validadas - los escriuts qui an l'estatut de saber	Après l'activitat : - traças escriutas : estructuracion de las coneishenças - tèxtes a l'estatut documentària (çò que l'eslhève e deu arretiéner) - ua evaluacion

Qu'ei en estèr rigorós dens la loa organizacion que los eslhèves e pòden préner marcas e que poiràn apréner e compréner lo ròtle de las diferentas fasis. Aquò que constitueish a l'encòp ua competéncia au nivèu deu lengatge e au nivèu de las sciéncias, pr'amor que permet aus eslhèves de desenvolopar lo lor esperit scientific.

### c. L'avaloracion

Lo quasèrn de sciéncias qu'ei un utis qui permet de véder l'evolucion deu tribalh scientific de l'eslhève, e qui permet de díser si las nocions a evaluar e son aquesidas o non. De mei, que pòt servir a validar competéncias en lenga. Tots los escriuts scientifics de l'eslhève estant arregropats dens aqueth quasèrn, òm pòt tanben apreciar los progrès hèits en expression escriuta, en gramatica, en ortografia, en conjugason etc... Que permet donc au regent de poder emplear lo libet personau de las competéncias. De mei, que pòt servir entà situar los eslhèves

per rapport a lo lor tribalh anterior, mes tanben per rapòrt a la classa. Lo regent que poirà donc constituir grops diferents pendent las fasis collectivas. En hèit, dus estrategias e son possibles. Sia e constitueish grops eterogenèus entà estirar los eslhèves los mei febles tà capsús. Aquò qu'ei préner lo risc que sian percut, o que sian a la plaça d'executant, qu'ei a díser que hàcian las tascas balhadas per los autes sens trop saber perqué. Sia e constitueish grops omogenèus. Dens aqueth cas, n'i a pas trop de risc entà que quauqu'un e sia deishat de costat, mes per lo còp, lo risc qu'ei que daubuns grops e sian lent dens la realization de l'activitat. Qu'ei donc interessant de variar de practica. Qu'ei a díser qu'ei plan de hèr grops a còps omogenèus e a còps eterogenèus. Atau, que seré interessant d'espiar lo quasèrn d'un medish eslhève dens aqueths dus cas, entà véder dens quau situacion ei lo mei eficaç.

Lo quasèrn d'experiéncias qu'ei donc un hòrt plan mejan entà poder evaluar los eslhèves. Mes dens aqueths escriuts, l'important qu'ei la demarcha e lo hèit scientifica. Donc ne cau pas trop s'arrestar sus las errors d'ortografia, de pontuacion o de sintaxi, çò qui risca de menaçar los objectius scientifics. En efèit, la tòca principala deu quasèrn d'experiéncias que demora las sciéncias. Mes totun, chic a chic, lo quasèrn que deu estar de mei en mei net e dab lo mens d'errors possible. D'alhors, d'après la Viviane Bouysse, òm deu poder tornar leguir tots los escriuts qui son dens lo quasèrn. Aquò que vòu plan díser que los eslhèves e devén hèr-s'y entà escrivé. Que conselha d'estar de mei en mei exigent au hiu de l'escolaritat, mes tanben a fin e a mesura que l'escolan e torna suu sué escriut. En efèit, ne cau pas desbrombar, que i a escriuts qui son escriuts per se-medish, qu'ei a díser expressions espontanèus. Qu'ei donc a fin e a mesura de l'escolaritat que los mainats e desenvolopan ua atencion ortografica. En contra, per çò qui ei deus escriuts institucionalizats, lo regent que pòt estèr mei exigent, pr'amor qu'arrepresenta lo saber saberut, donc lo modèl d'escriut scientific.

Si lo regent e deu aver ua flexibilitat suu punt de l'ortografia, que deu estar rigorós suu vocabulari emplegat. Per aquò, que sembla plan de privilegiar las activitats regularas e sistematica entà gardar ua traça deus tèrmis emplegats pendent las sequéncias. Òm pòt donc escrivé cada definicion en emplegar un utís tau com un lexic a la fin deu quasèrn o un quasèrn de mots. Aquò que va permeté d'enriquir lo lexic deus escolans.

### 3. *La plaça deu quasèrn de mots*

Lo quasèrn de mots qu'ei un quasèrn on los mots importants d'ua leçon e son sauvats. Que's presenta atau : qu'emplegam ua pagina per leçon. En haut que i a lo títol de la leçon, e los mots importants que son escriuts en devath, sens nat òrdi particular.

Que pòt estèr un quasèrn comun a totas las disciplinas, dens aqueth cas que cau precisar en haut de cada huelha de quau disciplina e s'ageish, o ua huelha en mei a la fin de la leçon, se fongionam dab un classader per exemple.

Aqueth utís que permet aus eslhèves de tornar formular la leçon gràcia aus mots. Que permet donc un apprentissatge basat sus la compreneson e non pas sus la memorizacion de frasas per còr.

Que podem botar en plaça ua sòrta de ritualizacion a l'entorn d'aqueith, on après cada leçon, que construsim amassa (professor e escolans) la fica de mots, e on los eslhèves que s'entrainan a casa tà restituir la leçon a parir d'aqueiths mots. Un còp tornat en classa, aqueiths mots que son emplegats tà verificar la compreneson de leçon .

### ***III. Practica de classa***

Entà poder verificar las teorias, que las cau aplicar sus ua sequéncia d'ensenhamant. Aquiu la trama d'ua sequéncia de sciéncias, sus lo tèma de mescladís e solucions, a poder testar dab ua classa de cicle 3. Aqueth subjècte qu'ei au programa deu CM1. D'après lo Bulletin Oficiau n°1 deu 5 de gèr 2012, a la fin de l'anada, los eslhèves e deven poder hèr las causas seguentas :

#### **Mélanges et solutions**

- Distinguer deux types de mélanges : homogènes et hétérogènes.
- Apprendre à séparer les constituants des mélanges par l'expérimentation.
- Identifier les procédés permettant de séparer les constituants des mélanges homogènes et hétérogènes.
- Connaître quelques caractéristiques des mélanges homogènes (conservation de la masse, saturation).

Vocabulaire : mélange, miscible, solution, soluble, dissolution, saturation, homogène, hétérogène, suspension, décantation, filtration.

Qu'ei a díser :

- Distinguir dus tipos de mescladís : omogenèus e eterogenèus
- Apréner a desseparar los constituents deus mescladís per l'experimentacion
- Identificar los procediments qui permeten de desseparar los constituents deus mescladís omogenèus e eterogenèus
- Conéisher quaques caracteristicas deus mescladís omogenèus (conservacion de la massa, saturacion)

Vocabulari : mescladís, mesclader, solucion, soluble, dissolucion, saturacion, omogenèu, eterogenèu, suspension, decantacion, filtracion.


La sequéncia qu'ei bastida de manèra a tractar aqueras competéncias. Que permet tanben de tribalhar competéncias deu pilièr 3b deu sòcle comun de las competéncias : cultura scientifica e tecnologica.

Qu'ei compausada de quate sedenças, dens las quaus la demarcha scientifica e lo quasèrn de sciéncias e son emplegats.

Aquera sequéncia qu'ei acompanhada d'ua sequéncia de lenga en parallèla entà tribalhar punts de lenga precís. En efèit, gràcia a la sedençà de sciéncia, òm pòt decontextualizar nocions de lengas.

Las duas sequéncias que seràn donc menadas en parallèla dab la classa de CM2 de l'escola bilingua de plasença deu Gèrs pendent l'annada 2012 – 2013. Quitament si aqueth tèma ei, normalament, tractat en CM1, n'ei pas un chepic de'u hèr en CM2 dab eths, pr'amor n'a pas estat tractat l'an passat.

Cada sedençà que serà au servici de l'auta. Aquiu, l'esquèma generau de l'imbricacion d'aqueras duas sequéncias, puish lo descriptiu de cada sedençà, devath la fòrma de fica de preparacion :



Dab :

- En sciéncias : mescladís e solucions omogenèas e eterogenèas
  - Sedença 1 : descobèrta de las solucions omogenèas e eterogenèas
  - Sedença 2 : proprietats de las solucions omogenèas e eterogenèas
  - Sedença 3 : los mescladís omogenèus e eterogenèus – la decantacion e la filtracion  
– bilanç
  - Sedença 4 : avaloracion
- En lenga : Qu'èra previst de tribalhar la conjugason deus vèrbes au present de l'indicatiu e au present de l'imperatiu coma sec :
  - Sedença 1 : l'enonciatiu
  - Sedença 2 : la conjugason a l'indicatiu
  - Sedenças 3 e 4 : l'imperatiu

Mes fin finala, au cap de la dusau sedençà, e en enténer-los a parlar, que'm soi apercebuda que l'enonciatiu n'èra pas plan mestrejat. Qu'ei donc decidat de hèr la mia sequéncia sencèra sus l'enonciatiu :

- Sedença 1 : Lo vèrbe e l'enonciatiu dens las frasas afirmativas e negativas (*tribalhat en sedenças 1 e 4 de sciéncias*)
- Sedença 2 : Entrainar-se a emplegar l'enonciatiu a l'orau dens ua question e dens la sua resposta
- Sedença 3 : Emplegar l'enonciatiu espontanèament dens un resumit a l'orau (*avaloracion formativa*)
- Sedença 4 : Avaloracion : Plan emplegar l'enonciatiu

Tot au long de la sequéncia de sciéncias, que tribalham l'emplec de l'enonciatiu a l'escriut.

## 1. Sequéncia de lenga : l'enonciatiu

### Sedença 1 : Lo vérbe e l'enonciatiu dens les frasas afirmativas e negativas

**Competéncia :** Construir corrèctament frasas afirmativas e negativas

**Objectiu :** Comprénder que l'enonciatiu que hè partida deu vérbe

**Descripcion :**

Durada	Debanar	Consigna	Organizacion	Materiau
10 min	<i>Fasi de mesa en rota :</i> Lectura de la debuta deu conte <i>Jan de l'Ors</i> (p1 – 16) → mantuns vérbes a la forma afirmativa e a la forma negativa	“Escotatz plan l'istòria”	Grop classa	Lo tèxte
10 min	<i>Fasi de recèrca :</i> - Lo regent que balha ua partida deu tèxte aus eslhèves (de la pagina 2 “La hemna qu’èra...” a la pagina 6 “ ...avanhons, amoras de tot...”) - Que devén solinhar tots los vérbes	“Tornatz leguir lo tèxte e solinhatz tots los vérbes”	Individuau	Lo tèxte
10 min	<i>Fasi de mesa en comun :</i> - Los eslhèves que dictan au regent los vérbes qu’an solinhat (lo regent que’us ecriu au	“Que vam corregir. Çò qu’avetz trobat coma vérbes ?”	Grop classa	Las produccions

	tablèu) - Que prepausa de'us arregropar en dus grops (fòrma afirmativa/fòrma negativa)	“Ne poirem pas arregropà’us en dus grops”		deus eslhèves e lo tablèu
10 min	<p><i>Fasi d'institucionalizacion :</i></p> <ul style="list-style-type: none"> <li>- Los eslhèves que construseishen la traça escriuta tots amassa :</li> </ul> <p>➤ <u>Exemple de traça escriuta :</u></p> <p>Los verbs que's pòden conjugar a la fòrma afirmativa o a la forma negativa.</p> <ul style="list-style-type: none"> <li>- a la fòrma afirmativa, òm bota QUE abans lo verb</li> <li>- a la fòrma negativa, òm remplaça lo QUE per lo NON/NE e òm horneish PAS après lo verb</li> </ul> <p>Exemple : lo tablèu de correccions</p>	“Que vam escriver un resumit. Cò que podem díser ?”	Grop classa	

#### Analisi e remediacions :

Los eslhèves que s'i escaden en majoritat tà relhevar los verbs. Sonque quauques uns que son desbrembats. Mes sovent, que's desbremban l'enonciatiu : entà eths, ne hè pas forçadament partida deu verb. Que podem tanben notar que i a, a còps, confusion entre lo QUE enonciatiu e lo QUÉ interrogatiu (véder en annexas dusau partida de *Jan de l'Ors* “de qué minjar”). De la madeish faiçon, que prenen cò qui ei davant un verb per un enonciatiu, quitament si ne n'ei pas un. Per exemple dens la frasa “cò qui trovava”, entà eth lo QUI qu'ei un enonciatiu.

Fin finala, aqueth tèxte qu'a donc puntat deu dit la complexitat de la npcion. Totun, n'a pas hèit puisheu a la realization de la leçon, puishque los eslhèves que son en CM2, e qu'an jà tribalhat sus l'enonciatiu.

### **Sedença 2 : Non pas desbrembar l'enonciatiu**

**Competéncia :** construsir corrèctament frasas afirmativas, negativas e interrogativas

**Objectiu :** Entrainar-se a emplegar l'enonciatiu a l'orau dens ua question e dens la sua resposta

**Descriptiu :**

Durada	Debanar	Consigna	Organizacion	Materiau
15 min	<p><i>Fasi 1 : fasi de mesa en rota</i></p> <ul style="list-style-type: none"> <li>- Lectura de la seguida deu conte de <i>Jan de l'Ors</i></li> <li>- Reperatge de la tornadura “Quin t'apèras? - Que m'apèri”</li> </ul>	“Escotatz plan l'istòria e assajatz de reperar ua frasa qui torna sovent”	Grop classa	Conte de <i>Jan de l'Ors</i>
15 min	<p><i>Fasi 2 : fasi d'entrainament</i></p> <ul style="list-style-type: none"> <li>- jòc dab la formula precedenta : amuishar l'exemple e demandar aus eslhèves de hèr parièr. A cada còp, tornar préner la paraula entà emplegar la 3au persona (tot aquò en amuishar</li> </ul>	“Jo que m'apèri Elodia. E tu quin t'apèras?” ( <i>l'eslhève que respon</i> ) “Eth que s'apèra ...” ( <i>a la classa</i> ) “... a tu de pausar la question” ( <i>a l'eslhève qui vien</i>	Grop classa	Afica de conjugason

	<p>a cada còp la terminason sus ua afica de conjugasson) → insistir sus la preséncia de l'emonciatiu</p> <p>- jòc dab d'autes verbs (a l'orau) : balhar un verb e demandar a un eslhève de pausa ua question dab eth (emplec de la 1era persona (singular/plurau)). Un aute eslhève que respon (2au persona (singular/plurau)). A cada còp, tornar préner la paraula entà emplegar la 3au persona</p>	<p><i>de parlar)</i></p> <p>“Adara, que vam hèr la madeisha causa dab d'autes verbs. Qui vòu pausar ua question dab lo verb ... ?”</p>		
--	---	--	--	--

#### Analisi e remediacions :

Los eslhèves que desbremban encòra l'emonciatiu. Pendent los purmèrs torns de paraulas que cau insistir sus l'emplec de l'emonciatiu. Au cap d'un moment, ne's desbremban pas mei l'emonciatiu dens las frasas afirmativas. Quan passam a las frasas negativas, que n'i a qui contunhan a emplegar lo QUE, shens o dab lo NE : que balhan donc frasas coma : “Qu'aimi pas” o “Que n'aimi pas”. Entà fixar aquera nocion, que caleré encòra hèr parlar los mainats, e torna'us préner a cada còp que hèn frasas atau. Qu'ei per aquò qu'ei contunhat de tribalhar sus aquera nocion, pendent dues sedenças.

### **Sedença 3 : Emplegar l'emonciaciò espontanèament**

**Competéncia :** Conjugar au present

**Objectiu :** Emplegar l'emonciaciò espontanèament dens un resumit a l'orau

**Descripció :**

Durada	Debanar	Consigna	Organizacion	Materiau
15 min	<i>Fasi 1 : fasi de mesa en rota</i> Lectura de la seguida da Jan de l'Ors (P 31 a 47)	“Escotatz plan l'istòria”	Grop classa	Conte de <i>Jan de l'Ors</i>
15 min	<i>Fasi 2 : fasi de recerca</i> Demandar au eslhèves de hèr lo resumit de la darrèra partida → insistir sus l'emplec de l'emonciaciò	“Çò qu'avetz comprés d'aquera darrèra partida ?”	Grop classa, a l'orau	

**Analisi e remediacions :**

Los eslhèves qu'an plan comprés l'istòria. La màger part ne's desbremba pas mei lo QUE emonciaciò, mes que contunhan tà díser “Que ne...”. Que cau donc encòra tribalhar aquera noción.

#### Sedença 4 : avaloracion

**Competéncia :** Conjugar au present

**Objectiu :** Verificar la competéncia deus eslhèves a emplegar l'emonciatiu quan s'exprimeishen a l'orau

**Descripcion :**

Durada	Debanar	Consigna	Organizacion	Materiau
15 min	<p><i>Fasi 1 : fasi de mesa en rota</i></p> <ul style="list-style-type: none"> <li>- Demandar aus eslhèves d'escriver un dialògue entre dus personatges de <i>Jan de l'Ors</i> sus lo subjècte deu lor choès. (hèr un tornar sus los personatges)</li> </ul>	“Botatz-vos per dus. Adara, que vatz escriver un dialògue entre dus personatges de <i>Jan de l'Ors</i> , sus lo subjècte deu vòste choès”	Grop classa	
15 min	<p><i>Fasi 2 : fasi d'entrainment</i></p> <ul style="list-style-type: none"> <li>- escritura d'un dialògue</li> <li>- verificacion de l'ortografia</li> <li>- jòc d'aqueth dialògue davant la classa</li> </ul>	“escrivetz un dialògue dab dus personatges de <i>Jan de l'Ors</i> en emplegar imperatius”	Per 2	Diccionari francés-occitan

Analisi e remediations :

Los eslhèves ne's desbremban pas l'emonciatiu a l'escriut, donc ne'u desbremban pas tanpòc quan passan tà l'orau tà hèr lo lor dialògue. Aquò qu'amuisha que los eslhèves qu'an plan comprés l'emplec de l'emonciatiu. Mes quan s'exprimeishen naturaument, que'u pòden

desbrembar. Que demora donc un tribalh a hèr a l'entorn d'aquò, dens las activitats de tots dia, en insistir tà qu'empleguen lo bon enonciatiu. Aquò qu'ei la pròba que ne son pas completament bilingües, mes que lo bilingüisme qu'ei en construccion.

## 2. Sequéncia de sciéncias : mescladís e solucions omogenèus e eterogenèus

### Sedenca 1 : descobèrta de las solucions omogenèas e eterogenèas

#### **Competéncias :**

- Distinguir dus tipos de mescladís : omogenèus e eterogenèus
- Practicar ua demarcha d'investigacion : saber observar
- Escrivér un tèxte cort deu tipo descripcion en hèr atencion a la sua coheréncia, a la sua precision (pronoms, mots de ligason, relacion temporala en particular) e esvitar las repeticions
- Presentar un tribalh a la classa en parlar dab frasas corregtas e dens un vocabulari adaptat
  - **Competéncias de lenga visada :** acòrd deu verbè dab lo sué subjècte – l'expression deu temps : present, passat, futur – l'enonciatiu

**Objectiu :** Descobrir las nocions de solucions omogenèas e eterogenèas

**Descripcion :**

Durada	Debanar	Consigna	Organizacion	Materiau
15 min	<p><i>Fasi 1 : Observacion – dessenh d'observacion</i></p> <p>Los escantilhs de las duas solucions que son pausadas sus las taulas. Los eslhèves que'us obsèrvan e que hèn lo dessenh d'observacion sus ua huelha de papèr blanc.</p>	“ Observatz plan las dues solucions e hètz un dessenh d'observacion.”		Un parelh de solucions, hèitas abans, per dus eshlèves : 1- aiga e siròp de granadina (solucion omogenèa) 2- aiga e òli (solucion eterogenèa)
10 min	<p><i>Fasi 2 : Observacion – tèxte explicatiu</i></p> <p>Un còp lo dessenh hèit, qu'explican çò que veden dens un petit tèxte (suu quasèrn d'experiéncias).</p> <p>Qu'amuishan las loas produccions a la regenta.</p> <p>➤ <b>Atencion portada sus los verbs (preséncia deu “que” enonciatiu)</b></p>	“ Explicatz çò que vedetz.”	Tribalh individuau	
10 min	<p><i>Fasi 3 : mesa en comun</i></p> <p>Quauques eslhèves e van au tablèu entà explicar la loa observacion. <b>Aqui que pausam lo lexic de sciéncias.</b></p>	“Explicatz çò qu'avetz vist.”		Dessenh d'observacion
10 min	<p><i>Fasi 4 : elaboracion de la traça escriuta dab lo vocabulari solucion, omogenèu, eterogenèu</i></p> <ul style="list-style-type: none"> <li>- Lo regent qu'escriu sus ua grana afica çò que dictan los eslhèves (que demorarà dens la classa dinc a la fin de la sequéncia).</li> <li>- Los eslhèves que pegan lo dessenh d'observacion,</li> </ul>	“Que vam escriver tot çò qu'avem ditz.”	Grop classa	Quasèrn d'experiéncias – Grana afica

	<p>puish que copian la traça escriuta suu quasèrn d'experiéncias</p> <p>➤ <u>Exemple de traça escriuta :</u></p> <p>Que i a dus tipos de solucions : las solucions omogenèas e las solucions eterogenèas + fotos</p>		
--	--	--	--

#### Analisi e remediacions :

Los eslhèves qu'an viste vist que i avèva dues fasis dens ua solucion e ua dens l'auta. Que n'i a qui coneishèvan dejà lo mot de mescladís. L'activitat qu'ei estada viste hèita e los eslhèves que son demandaires. Que hèn lo lor dessenh d'observacion e qu'escriven ua frasa d'observacion. Ne semblan pas briga sospres per aquera faïçon de tribalhar : que son ja acostumats au quasèrn d'experiéncias. En espiar las loas produccions, que podem véder que quauques eslhèves emplegan plan los enonciatius. Tà d'autes, qu'ei drin mei confús : que n'i a hèra qui emplegan plan lo NE...PAS tà la negacion mes qui's desbremban lo QUE tà l'affirmacion. Dilhèu que hèn ua correspondéncia dab lo Francés. En efèit, en Francés que disem per exemple : “je NE mange PAS” tà “NE mingi PAS” mes que disem “je mange” tà “QUE mingi”. D'autes ne tiran pas lo QUE tà la negacion e que contunhan de díser “QUE NE mingi pas” (cf. *Produccion d'eslhèves : dessenhs d'observacion e frasas d'observacion, Plasença 2012 – 2013*, en annexas).

Que demandan çò qui se seré passat dab autes solides o d'autes liquides. Davant aquera hòrta demanda, qu'èi prepausat aus eslhèves d'amiar per lo còp seguent tot çò que vòlen testar. E qu'èi donc drin amainatjada la sedençà 2. Qu'èra previst de tornar partir de las dues solucions de la sedençà dus. A la plaça, que soi partida de çò que los eslhèves avèvan amiat, e qu'avem ajustat ua fasi.

## Sedença 2 : proprietats de las solucions omogenèas e eterogenèas

### Competéncias :

- Distinguir dus tipos de mescladís : omogenèus e eterogenèus
- Practicar ua demarcha d'investigacion : saber observar, questionar
- Manipular e experimentar, formular ua ipotèsi e testar-la, argumentar
- Notar ideas, ipotèsis, informacions utiles au tribalh escolaria
- Construir frasas interrogativas

➤ **Competéncias de lenga visada :** l'enonciatiu

**Objectiu :** apropià's la nocion de las solucions omogenèas e eterogenèas

### Descripciom :

Durada	Debanar	Consigna	Organizacion	Materiau
	<b>Fasi 0 (ajustada, après la sedença 1) :</b> <ul style="list-style-type: none"><li>- Los eslhèves que balhan a l'ensenhaire tot çò qu'an amiat : vinagre de fruta arroja, leishiva, liquide vaishèra, chicolat.</li><li>- Qu'assajan d'endeviar de quau sòrta e va estèr cada solucion d'un constituant dab aiga</li><li>- Que hèn las solucions eths-madeishs tà verificar</li><li>- Que trigan las qui son omogenèas e las qui son</li></ul>	“Que vam assajar de mesclar aquelhs constituents dab l'aiga. Qui vòu botar...?”		

	eterogenèas			
10 min	<p><i>Fasi 1 : problèmes e ipotèsis</i></p> <ul style="list-style-type: none"> <li>- Lo regent que pausa los dus problèmes segunts :</li> <li>1/ Ei possible de mesclar los constituents de la solucion eterogenèa ?</li> <li>2/ Ei possible de desseparar los constituents de las solucions ? Quin hèr ?</li> <li>- Los eslhèves qu'escriven lo problème suu quasèrn d'experiéncias e que pausan ua ipotèsi en grop.</li> </ul>	“ Formulatz ua ipotèsi entà poder respóner ad aqueths dus problèmes”	Grops omogenèus	Solucions omogenèas e eterogenèas sus lo burèu de la regenta
15 min	<p><i>Fasi 2 : experiéncia</i></p> <ul style="list-style-type: none"> <li>- Los escòlans qu'escriven en grop un protocòlle experimentau entà testar la loa ipotèsi (a hèr verificar au regent)</li> <li>- Que hèn l'experiéncia</li> <li>- Qu'escriven las permèras arremarcas</li> </ul>	“ Esrivetz un protocòlle experimentau entà poder verificar la vòsta ipotèsi e verificatz la”	Grops omogenèus	Las solucions per cada grop
15 min	<p><i>Fasi 3 : espleitada deus resultats de las experiéncias</i></p> <ul style="list-style-type: none"> <li>- Los eslhèves qu'observen los resultats de las duas experiéncias</li> <li>- Que hèn ua conclusion corteta (que l'escriven suu quasèrn d'experiéncia)</li> </ul>	“ Tornatz préner las vòstas experiéncias e observatz lo resultat. Que çò que podem díser ?”	Madeishs grops	Lo tablèu

10 min	<p><i>Fasi 4 : mesa en comun</i></p> <ul style="list-style-type: none"> <li>- Los resultats e las conclusions que son botats en comun</li> <li>- Los eslhèves qu'elaboran la traça escriuta dab l'ajuda deu regent.</li> </ul> <p>➤ <u>Exemple de traça escriuta :</u></p> <ul style="list-style-type: none"> <li>- Las solucions eterogenèas ne's pòden pas mesclar</li> <li>- Las solucions omogenèas ne's pòden pas desseparar + fòtos de las manipulacions</li> </ul>	<p>“ Que vam assajar de hèr ua conclusion amassa”</p>	<p>Grop classa</p>	<p>Afica deu còp passat</p>
--------	---	---	--------------------	-----------------------------

#### Analisi e remediacions :

Los eslhèves que dintran plan dens l'activitat. Dens la fasi 0 qu'ariban tà la conclusion seguenta : de faïçon generala, quan un còs qu'ei gras, ne's mescla pas dab l'aiga.

Tà respóner au problema, a la debuta ne veden pas trop quin hèr, mes chic a chic que semblan aver un hèish d'idea. Fin finala, que hèn quasi tots experiéncias diferentas. Tà verificar si ua solucion eterogenèa e's pòt mesclar, un grop qu'assaja de virar, l'auta de bohar. Tà saber si ua solucion omogenèa e's pòt desseparar, un grop qu'assaja de virar, un aute d'ajustar aiga, e un auta d'ajustar òli (en pensar que dilhèu lo siròp e va passar dens l'òli).

Tà çò qui ei deu protocòlle experimentau que devèva servir, indirectament tà escrivér frasas afirmativas e negativas en emplegar plan l'enonciatiu : aquò n'ai pas ua escaduda. Digun n'a plan escript las frasas negativas (cf. *Produccion d'eslhèves : protocòlle experimentau, Plasença 2012 – 2013*, en annexas). Aquò qu'amuisha plan, que sortit deu contèxte, ne tornan pas investir las loas coneishenças. Qu'ai de dòu. Dilhèu qu'aurèi devut plan insistir abans qu'escriven las loas frasas.

### Sedença 3 : los mescladís solide-liquide – la decantacion e la filtracion

#### Competéncias :

- Distinguir dus tipos de mescladís : omogenèus e eterogenèus
- Apréner a desseparar los constituents deus mescladís per l'experimentacion
- Identificar los procediments qui permeten de desseparar los constituents deus mescladís omogenèus e eterogenèus
- Conéisher quauques caracteristicas deus mescladís omogenèus (conservacion de la massa, saturacion)
- Manipular e experimentar, formular ua ipotèsi e testar-la, argumentar

**Objectiu :** descobrir la proprietat de saturacion deus mescladís

#### Descripcion :

Durada	Debanar	Consigna	Organizacion	Materiau
15 min	<p><i>Fasi 1 : situacion problema e ipotèsis</i></p> <ul style="list-style-type: none"><li>- Amuishar aus eslhèves que lo mescladís solide-liquide deu còp passat s'ei desseparat : que i a ua depaus au hons.</li><li>- Demandar çò qui s'ei passat</li><li>- Los eslhèves que hèn ipotèsis (dilhèu que i a pro de chicolat)</li></ul>	<p>“Qu’ei tornat espiar las solucions deu còp passat, e qu’ei vist aquò. Çò qui s’ei passat ?”</p> <p>Questions entà bota’us sus la pista :</p> <ul style="list-style-type: none"><li>- Ei omogenèu o eterogenèu?</li><li>- perqué l’aiga ei colorada? → pr’amor qu’i demora chicolat</li><li>- perqué tot lo chicolat n’ei pas demorat dens l’aiga?</li></ul>	En grop classa	Lo mescladís aiga-chicolat

20 min	<p><i>Fasi 2 : experiéncias</i></p> <ul style="list-style-type: none"> <li>- Los eslhèves qu'escriven un protocòlle experimentau entà testar diferents mescladís aiga-chicolat, dab mei o mens de chicolat, e que'us testan</li> </ul> <p style="padding-left: 2em;">➤ <b>Atencion portada sus los verbs (emplec correct de l'enonciatiu)</b></p> <ul style="list-style-type: none"> <li>- Que tiran conclusion</li> </ul> <p><i>Diferenciacion</i> : òm pòt pausar ua navèra question aus grops qui son en avança : “E podem recuperar lo chicolat qui ei au hons? Quin hèr?”</p>	<p>“ Verificatz l'ipotèsi. Escrivetz tot çò que hètz entà poder explicar aus autes après.”</p>	En grop	Veires, aiga, chicolat en podra
	<p><i>Fasi 3 : mesa en comun e traça escriuta</i></p> <ul style="list-style-type: none"> <li>- Los eslhèves qu'explican çò qu'an hèit e que balhan las loas observacions</li> <li>- Que bastim la traça escriuta (sus l'afica)</li> </ul> <p style="padding-left: 2em;">➤ <u>Exemple de traça escriuta :</u></p> <p>Quan mesclam un solide dab un liquide, si òm bota trop de solid, ne's mescla pas coma cau. Òm dit que lo mescladís qu'ei saturat. Òm pòt</p>	<p>“Que vam hèr la conclusion tots amassas”</p>	Grop classa	Afica deu còp passat

	arrecuperar lo chicolat solide en filtrar.			
	<p><i>Fasi 4 : bilanç</i></p> <ul style="list-style-type: none"> <li>- L'ensenfant que distribua lo bilanç : qu'ei un tèxte a traucs a emplear dab los mainats (véder annexas : <u>bilanç</u>).</li> <li>- Lo bilanç qu'ei empleat en gropas classa</li> <li>- A la fin que i a un espaci tà poder escriver los mots importants tà funcionar coma un quasèrn de mots</li> <li>- Que hèm víver lo quasèrn de mots (d'autres còps abans la leçon tanben)</li> </ul>	<p>“Que vam hèr lo bilanç amassa. Qu'èi picat un tèxte, mes qu'i demora traucs que cau emplear.”</p>	Grop classa	Fica bilanç

#### Analisi e remediacions :

Los mainats que son curiós d'aquera activitat. Que semblan urós de manipular tot sols. Mes sovent, emportats per l'activitat, que's mancan lo moment on passan a un mescladís saturat. Que n'i a totun quauques uns qui an vist que dab ua petita quantitat, lo chicolat que passa dens l'aiga, e qu'au cap d'un moment que veden petits punts : lo mescladís qu'ei saturat. Qu'èi donc tornat hèr l'experiéncia e qu'èi amuishat a tota la classa lo mescladís saturat.

N'avem pas avut lo temps de hèr la filtacion, mes que semblan plan aver comprés lo funcionament : qu'an hèit la palanca dab la cafetèra.

Per çò qui hèi deu quasèrn de mots : n'an pas la costuma de l'emplegar, mes que's prenen plan au jòc. Qu'ei lo parat d'enténer tot lo monde a parlar, de verificar que tot lo monde aja plan comprés la leçon, e de rectificar causas si cau.

## **Sedença 4 : avaloracion somativa**

### **Competéncias :**

- Distinguir dus tipos de mescladís : omogenèus e eterogenèus
- Conéisher quauques caracteristicas deus mescladís omogenèus (saturacion)
  - **Competéncia en lenga tribalhada :** l'enonciatiu

**Objectiu :** verificar la compreneson de las nocions vistas

### **Descripcion :**

L'avaloracion qu'ei distribuida e los eslòves que l'a hèn individuaument. Si an besonh d'ajuda, que lhèvan lo dit (cf. *Avaloracion*, en annexas tau contengut).

### Analisi e remediacions :

L'avaloracion que's passa dens lo calme. Que n'i a qui an besonh de mei de temps que d'autas. Las resultas que son satisfasentas : la màger part deus eslòves qu'an plan comprés la leçon. Tà çò qui ei de l'emplec deu bon enonciatiu, ne's son pas trop enganats. Dilhèu que se son plan concentrats, pr'amor qu'èra ua avaloracion. Totun, qu'èi podut notar qu'an sustot emplegats frasas afirmativas on son plan adaisa (cf. *Produccion d'eslhèves : avaloracions*). Que caleré hèr ua navèra avaloracion drin de temps après entà verificar qu'an plan integrat coma e calèva emplegar l'enonciatiu.

### ***3. Analisi globala***

Aqueras duas sequéncias hèitas en parallèle qu'an plan contribuit a construsir lo bilingüisme : la sequéncia de sciéncia qu'a permetut de tribalhar punts de lenga. En efèit, lo vocabulari qu'a plan estat integrat peus mainats : la màger part d'entre eths que hèn plan la diferencia entre mescladís omogenèu e mescladís eterogenèu, que saben plan emplegar los tèrmes de saturacion, filtracion, decantacion, mescladís, solucion... De mei la sequéncia de sciéncia qu'a permetut de tribalhar sus l'enonciatiu, e quitament si la nocion n'ei pas plan installada per tot lo monde, que podem díser qu'existeish au mens ua consciéncia per rapòrt au

sué emplec, e adara, quasi tots los eslhèves e's saben corregir quan hèn lo maishant emplec, a l'orau coma a l'escriut.

Per çò qui ei de la demarcha scientifica, òm pòt díser qu'aquera èra dejà coneguda deus mainats. En efèit, los mots Problèma, Ipotèsi, Experiéncia, Conclusion, ne'us èra pas desconeeguts. De mei, que sabèvan a qué cadua e corresponèva, e qu'èran dejà acostumats a emplegar lo quasèrn de sciéncias, pr'amor qu'an pres tot sols ua huelha jaune au moment de hèr escriuts personaus.

En contra, n'èran pas acostumats au quasèrn de mots. E quitament si a la debuta qu'an trobat drin estranha aquera faiçon de funcionar, au cap d'un moment qu'an pres plaser a "hèr parlar los mots". Aqueth utís qu'ei vertadèrament un mejan de verificar la compreneson deus eslhèves e a la vista de las frasas que hèn, que podem ajustar las causas.

## Conclusion

L'estat qu'a botat en plaça ua paritat orària dens l'ensenhament bilingüe de l'education nacionala. Aquera que preved d'ensenhar la mitat deus cors en francés, e l'autra mitat en lenga regionala. Aquò que permet de desenvolopar entà'us mainats compéténcias específicas, ligadas au bilingüisme, e qui balhan aus eslhèves bilingües capacitats que los eslhèves monolingüe ne possedin pas.

Dens ua classa bilingua, las compéténcias lengatgèras que's construseishen tot au long de l'annada a travès las differentas disciplinas. Vertat qu'ei, cada disciplina que permet de tribalhar punts de lenga, a l'orau tau coma a l'escriut, mes tanben ua consciéncia bilingua. En efèit, en parlar en occitan, los eslhèves que hèn palancas dab lo francés, que sia dab lo vocabulari o dab la construcción de las frasas.

Tà poder desenvolopar aqueras compéténcias, un hèish d'utís que son au servici deus ensenhants. Qu'avem vist aquiu que, tà las sciéncias, l'emplec deu quasèrn de sciéncias que permet aus eslhèves de poder escriver en occitan, regularament e liurament, sens aver paur de s'enganar, estant balhat l'estatut especiau de l'error dens la partida personala d'aqueuth quasèrn. Gracia ad eth, lo regent que pòt tanben saber a pus pres on n'ei un eslhève per rapòrt a ua nocion de lenga. Enfin aqueuth utís qu'ei hèra plan tà poder entrainà's a l'expression escriuta de tèxtes mei o mens corts.

De la madeisha faiçon, la demarcha científica que permet d'emplegar diferents tipos de frasas e donc de variar las activitats d'escriptura.

Enfin, lo quasèrn de mots qu'ei un hòrt plan utís tà apréner los diferents mots de vocabulari d'ua leçon. En efèit, que permet d'un costat de fixar los mots e de'us escriver, e d'un auta, que permet d'enténer los eslhèves a parlar au moment de la restitucion en gropas classa.

Fin finala, tots aqueuth utís que permeten de desenvolopar compéténcias a l'escriut, mes tanben a l'orau.

Que i a donc mantuns utís a la disposicion deus ensenhants tà rénder possible lo desenvolopament de compéténcias lengatgèras dens ua sequéncia d'aprentissatge de las sciéncias dens ua classa bilingua.

### Bibliografia

- Construire des savoirs en plusieurs langues. Les enjeux disciplinaires de l'enseignement bilingue – Daniel Coste
- Immersion, bilinguisme et interaction en classe – Laurent Gajo
- Quelle grammaire enseigner ? – hâtier
- Ecrire en sciences, Carnet d'observations, cahier d'expériences – Marylène Brare et Denis Demarcy
- Science et langage : quelques repères pour l'école primaire – compte-rendu de l'intervention de Viviane Bouysse au colloque « sciences en jeu » du 14/02/2007
- Article : le bilinguisme – Nadine Kuehne
- Article : Bilinguisme précoce, avantage ou handicap ? – Nicole Denni-Krichel
- Programme de référence pour le développement de l'enseignement de la langue et de la culture (2009-2015)
- Circulaire rectoriale du 10 janvier 2000
- Circulaire nationale n°2001-167 du 5-9-2001.
- Bulletin officiel du ministère de l'éducation nationale et du ministère de l'enseignement supérieur et de la recherche n°3 du 19 juin 2008
- Bulletin officiel du ministère de l'éducation nationale et du ministère de l'enseignement supérieur et de la recherche n°1 du 5 janvier 2012
- Socle commun des connaissances et des compétences


### Webografia

- Site de « la main à la pâte » : [www.lamap.fr](http://www.lamap.fr)
- Site iufm créteil : [www.creteil.iufm.fr](http://www.creteil.iufm.fr)

Site cap'oc : crdp.ac-bordeaux.fr/capoc/

# Annexas

## Démarche scientifique – IUFM de Créteil



## Type d'observation selon la démarche et les objectifs – Ecrire en sciences

### ▼ TYPES D'OBSERVATION SELON LA DÉMARCHE ET LES OBJECTIFS

Observations	Rôle
Observation libre.	<ul style="list-style-type: none"><li>– Susciter la curiosité et amener au questionnement.</li></ul>
Observation organisée (orientée ou systématique).	<ul style="list-style-type: none"><li>– Rechercher des critères et-ou des indices.</li><li>– Vérifier une hypothèse.</li><li>– Sélectionner des éléments observables.</li></ul>
Observation comparée (avec d'autres, avec des documents).	<ul style="list-style-type: none"><li>– Permet de faire des sériations ou des classements.</li><li>– Permet de faire des comparaisons d'observations faites avec des techniques différentes.</li><li>– Permet de faire des déterminations à l'aide de clés ou de modèles.</li></ul>
Observation continue ou prolongée.	<ul style="list-style-type: none"><li>– Faire des comparaisons dans le temps.</li><li>– Comprendre l'évolution d'un phénomène.</li></ul>
Observation au cours d'une expérimentation.	<ul style="list-style-type: none"><li>– Établir des relations de causalité.</li><li>– Constater et interpréter des résultats.</li></ul>

## Occasions fonctionnelles d'écrire en sciences – Ecrire en sciences

### ▼ DES OCCASIONS FONCTIONNELLES D'ÉCRIRE EN SCIENCES

1. En début de démarche	3. En fin de démarche
<ul style="list-style-type: none"><li>– Conceptions initiales.</li><li>– Questions que l'élève (ou la classe) se pose.</li><li>– Problème à résoudre (ou question à se poser).</li><li>– Hypothèses imaginées.</li><li>– Projet d'expériences.</li></ul>	<ul style="list-style-type: none"><li>– Tableau de résultats.</li><li>– Graphique.</li><li>– Schéma explicatif.</li><li>– Résumé » de ce qui est à retenir.</li><li>– Affiche pour communiquer.</li></ul>
2. Au cours de la démarche	4. Au cours de l'évaluation
<ul style="list-style-type: none"><li>– Dessin d'observation.</li><li>– Notes d'observation.</li><li>– Relevé de mesures.</li><li>– Prise de notes pendant une visite, une sortie, au cours d'une enquête.</li><li>– Informations sélectionnées dans un document.</li><li>– Compte rendu d'expériences.</li></ul>	<ul style="list-style-type: none"><li>– Restitution de mémoire d'un schéma ou d'une définition.</li><li>– Schéma à légendier ou à expliquer par un texte court, etc.</li></ul>

## Supports – Ecrire en sciences

### ▼ LES SUPPORTS

#### Le classeur

Comment?	Pour quel usage?	
Des couleurs différencient.	Les traces individuelles personnelles.	Au début, pour amorcer l'activité: – des remarque(s) et question(s) de départ; – des représentations; – des observations libres, etc.
	Celles du groupe.	Pendant l'activité: – question(s) retenue(s) au stade du groupe classe) et reformulée(s) avec l'aide du maître; – expériences, recherche documentaire.
	Les écrits institutionnels.	Après l'activité: – trace écrite mémoire : texte de statut documentaire (ce que l'élève doit retenir); – évaluation.

#### Deux cahiers

Comment?	Pour quel usage?
Un cahier d'essais propre à l'élève et propre aux activités scientifiques. Prévoir une notice à destination des parents pour expliquer la tolérance raisonnée concernant autant l'orthographe que les hypothèses.	Au début, pour initier l'activité: – des remarque(s) et question(s) de départ; – des représentations; – des observation libre, etc. Pendant l'activité: – une (des) question(s) retenue(s) (au niveau du groupe classe) et reformulée(s) avec l'aide du maître; – des expériences, recherches documentaires, etc. ; – des traces écrites mémoire pour avancer dans la recherche.
Et en parallèle:	
Un cahier contenant: – les démarches validées; – les écrits ayant le statut de savoirs.	Après l'activité: – des traces écrites: structuration des connaissances; – des textes au statut documentaire (ce que l'élève doit retenir); – une évaluation.

## Traças escritas de la classa de Plasença (CM1 – CM2)


Ipotèsis individualas :

Questionament: Coma funciona lo manètge?


La mia ipòtesi:

Coma funciona lo manètge?

Schema



Qu'avèm realizat un manètge que vira!  
Qu'avèm descobert son mecanisme d'entrenament.  
Mes espiaçatz coma vira plan!




La classa de CM1 de l'escola  
Jean Jaurès, París.

O'Bryant


Qüestionament: Coma funciona lo manètge?

La mia hipòtesi:

Coma funciona lo manètge?



Qu'avèm realitzat un manètge que vira!  
Qu'avèm esconut son mecanisme d'entrainment.  
Mes espintz coma vira plan!



La classe de CM1 de l'escola  
Jean Jaurès, París.

Flumenic

O

L'ora Questionament:

O


Coma funciona lo manètge?

La mia ipòtesi:

O


Coma funciona lo manètge?

O



O


O



O

O

Qu'avèm realitzat un manètge que vira!  
Qu'avèm esconut son mecanisme d'entrainment.  
Mes espítz coma vira plan!



La classe de CM1 de l'escola  
Jean Jaurès, Paris.

Rimaud  
d'era

O

Qüestionament:

Coma funciona la manètge?

O

La mia hipòtesi:

Coma funciona la manètge?


O

~~La manètge qui vira l'altra vira.~~  
~~La manètge qui ei sur ua ràgue qui vira e quant-vira la manètge que vira.~~

O

O

la manètga



O

O

que marxa dalt ua roue.

O


O

O


O

Mathias

S'ipotèsi que n'hi no validada



S'ipotèsi que qu'hi validada




Ipotèsis de grup :




Loma faciona lo magéga

shema



Goma fonciona lo manètge?


Quant vira la manivella les arrodes dentada  
per gràcia un dent que se toc.



3 arrodes dentats / una manivella / una serra i una plataforma.

L'ipòtesi del grup:

Aleuria




L'ipòtesi qu'ei validada


*L'interior del grup*

*Coma funciona lo manètge?*

*Quan vira la manivella les arrodes dentades  
que granejant el dent que se tot.*



*Qu'avèm realizat un manètge que vira!  
Qu'avèm esconut son mecanisme d'entrainment.  
Mes espiatz coma vira plan!*



*La classe de CM1 de l'escola  
Jean Jaurès, París.*


Sintesi :

### Oxigenis

Diàvarem trobat molts mecanismes que permeten de fer girar la maneta i doncs de transmetre el moviment de rotació.

1

#### Los engranajes





arròdes dentats

Una arròda mida que entraïna una o moltes arròdes mides.


La resa de rotació a la sortida d'un engranatge que depèn del nombre d'arròdes dentats.

2. La transmisió polia - correja




La polia que entraïna una correja que entraïna una altra polia - entraïna.

La resa rotació a la sortida d'una transmisió polia - correja que ho mesura.




3.2) transmission chaîne

pignon - pignon



Ela arròda dentada qui entraïna ua cadena qui entraïna ua auta arròda dentada.

Lo sens de rotaclon a la dintrada e a la sortida d'ua transmission cadena-pignon qui lo medish



## Evaluacion :


Que m'apèri : ..... Clara .....

Data : ... 24/04/2012 .....

### Evaluacion de matematicas

Compétences évaluées	Acquis	En cours d'acquisition	Non acquis
Savoir ce qu'est un engrenage et son fonctionnement			
Connaitre le vocabulaire lié aux engrenages			
Connaitre le sens de rotation des roues dans un engrenage			
Connaitre d'autres mécanismes de transmission de mouvements et le vocabulaire lié			

1. Hè l'esquèma d'un engranatge e legenda-lo.




2. Explica coma funciona un engranatge.

Un engranatge que funciona del arròdas dentadas. Ye i a un nombre pair d'arròdas, quan bira la manivela, ne torna pas la medish. sols e quan i a un nombre impair d'arròdas, que torna la medish. que ia ua arròda mirada e arròda mirada.


3. Indica dab sagetas lo sens de rotacion de las arròdas dentadas.

4. Tròba dus autes mecanismes de transmission de moviment, dessenna e legenda-los.

polia - correja:






cadena - pinion:



Producccion d'eslhèves, Plasença 2012 – 2013

Dessenh d'observacion e frasas d'observacion :



L'oli ne se mesclen pas e la granadina se mesclen del.  
Li digo.

### Protocòlle experimentau :


1) E podem mesclar las solucions etereogenives?

protocòl experimentau : que can mesclar s'ent e longtemps e que se mescla entà pas longtemps.

Que me fonciona pas.

2) E podem desseparar las solucions omogenees?

protocòl experimental : que podem picar la palla e que se separa e que se dessepara e que es sigue.



me manda pas.

## Bilanç :


### Bilanç : los mescladís omogenèus e eterogenèus

Qu'existeish dus tipos de mescladís :

**Los mescladis** \_\_\_\_\_

Los constituants \_\_\_\_\_ mesclats,  
e ne podem pas deseparar-los.


Exemple :



**Los mescladís** \_\_\_\_\_

Los constituants \_\_\_\_\_ mesclats.  
Los podem véder l'un sus l'autre.

Exemple :



Quan mesclam un solid dab un liquid, si botam \_\_\_\_\_, ne's mescla pas coma cau. Que's dit que lo mescladís qu'ei \_\_\_\_\_. Que podem arecuperar la partida non mesclada en \_\_\_\_\_.

### Protocòl experimentau de la filtracion :

- Prenetz lo mescladís a filtrar, un filtre (ua passadèra o un filtre a café) e un autre recipient
- Botatz la passadèra sus lo recipient
- Versatz lo contingut dens la passadèra. Lo liquid que s'aretroba dens \_\_\_\_\_ e lo solid que s'aretroba dens \_\_\_\_\_.


## Avaloracion :

### Avaloracion : los mescladís


#### Exercici 1 :

1- Completa dab los bons mots

Solucion \_\_\_\_\_



Solucion \_\_\_\_\_



2- Qu'as aquiu ua lista de mescladís. Escriu los dens la bona colona de la question 1.

*Aiga e òli – Aiga e menthe – Òli e granadina – Liquid tà hèr la vaishèra e aiga – Leishiva e aiga – Aiga e café – Aiga e chicolat – Aiga e granadina*

#### Exercici 2 :

1- Balha un exemple de mescladís qu'òm pòt deseparar.

---

2- A quau tipo de mescladís aparten?

---

3- Explica quin hès, entà deseparar los constituants d'un mescladís solid-liquid.

Entà deseparar aqueth mescladís, que .....


Produccion d'eslhève :

3- Explica quin hès, entà deseparar los constituants d'un mescladís solid-liquid.

Entà deseparar aqueth mescladís, que ... *dia filtre dab un filtre : que brotie aiga e café dens un filtre e l'aiga que renva en e lo café que resta*

3- Explica quin hès, entà deseparar los constituants d'un mescladís solid-liquid.

Entà deseparar aqueth mescladís, que ... *primer un filtre e Rei passar l'aiga a travers lo filtre.*



## Libet de Jan de l'Ors :

Un còp èra, ua hemna qu'amassava sostre en un tojar entà har lo palhat de las vacas. Mentre qui èra de cap a nodar la lheitèra, qu'entenó a croishir brancas. Un ors que sortí deu bòsc, que la gahè e que se'n la portè.

La hemna qu'èra a las totas, que credè que l'ors e la se volè minjar. Tot au contra, non li hasó pas briga de mau.

Totun que's perdó la coneishença.

Quan la hemna e s'arregahè, qu'èra dens ua tuta e l'ors que la lecava las mans. L'ors non l'avè pas hèit arren, mes qu'èra plan embarrassada ! Ua pèira de las granas, de cent quintaus, que barrava l'entrada de la tuta e que l'empachava de sortir.

Aquera bèstia non li volè pas har mau ; cada dia que partiva tà cercar de qué minjar e que tornava çò qui trobava : mèu, carn, averans, avanhons, amoras, de tot...

La hemna que s'acostumè, per fòrça. Be calè que s'acostumèsse ad aquera vita. Què calè har ? Tant e tant qu'un dia que sentí qu'èra gròssa e qu'anava estar mair.